

HITZ BITAN

GARRAIOA

Garraio sistema adimendunez biltzarra egingo dute, Bilbon, datorren astean

Gorane Agirre | BILBO

Datorren astean Bilbon egingo duten Garraio Sistema Adimendunei buruzko Biltzarrean, «gizarte informazioa garraioan» aplikatzeko moduei buruz eztabaidatuko dute.

Biltzarra ekainaren 20tik 23ra bitartean egingo dute Bilboko Euskalduna jauregian, eta bertan 800 biltzarkidek hartuko dute parte, horietatik %60 atzerritarrek. *Hiria esku-eskura* lelopeko biltzarra Bizkaiko Diputazioak, Bilbao Metropoli 30 elkarteak eta garraio sistema adimendunen erabilera sustatzen duen Ertico Europako erakundeak antolatuko dute.

Garraio azpiegitura berrien eraikuntza oinarri duen egungo eredua, dauden baliabideen aprobetxamendua areagotzea ardatz duen beste bategatik ordezkatzearen aldeko apustua egiten dute antolatzaileek. Ildo horretan, besteak beste, garraio publiko zein pribatuaren erabiltzaileari, unean uneko trafikari buruzko informazioa eskaintzea proposatzen dute.

Garraiohide guztietarako txartel bakarra

Biltzarrak iraungo dituen lau egunetan, hainbat garraio sistema adimendunen proiektuak aurkeztuko dituzte. Horien artean, Bizkaian jarduten duten garraio enpresa guztietan erabili ahal izango den txartel bakarra dela nabarmendu zuen Jose Felix Basozabal Garraio eta Herrilan diputatuak.

Era berean, Bilboko sarbideetan Diputazioak eta Bilboko Udalak dituzten kamerekin unean bertan, zuzenean eta on-line lotzeko sistema ere aurkeztuko du Foru Aldundiak. Bestalde, Biltzarrak iraun bitartean eta hala eskatzen duten herritarrek Bizkaiko errepideen egoerari buruz Malmasin-go Trafiko Kontrol Zentruaren informazioa jaso ahal izango dute.

BEHI EROAK. Nafarroako Gobernuak «arrazoi politikoak» dituela salatu du

Zati arriskutsuen arazoa «behingoz konpontzeko» eskatu du Parlamentuak



JESUS DIGES / EFE
Goiko irudian langile bat hondakinak errausketa plantara eramaten; behekoan, aldiz, hondakinak erre osteko irudia.

'BEHI EROAK'

ABk eta Berdeek ELB sostengatu eta prefetaren jokamoldea gaitzetsi dute

Behi eroen krisia dela eta, ELBren eskakizun «zuzen bezain egokiak baztertzeara» salatu du Abertzaleen Batasunak. Joan den astean laborariek burutu protesta ekintzak erantzun «basa bezain proportzioz kanpokoak» jaso zuela dio ABk. Manifestazioan atxilotuak izan ziren hiru laborariek elkartzatua adierazi zuen alderdi abertzaleak. Euskal Herriko Berdeek behi «hazkuntza industrialaren logika» gaitzetsi zuten. Hauek ere «errepresioa ez dela aterabidea izaten ahal» ohartarazi zuten.

GERTAKARIA

Suzko arma baimenik gabe edukitzeagatik 10 hilabeteko espetxe zigorra jarri diote

Iruñeko Epaitegiak hamar hilabeteko espetxe zigorra ezarri dio suzko arma baimenik gabe izan eta hainbat tiro airera egin zituen pertsona bati. Gertaerak 1999ko abuztuaren 5ean jaso ziren Agoitzen (Nafarroa), 38 urteko Emilio A. V.-k eskopeta eta 63 kartutxo hartu eta airera tiro egiteari ekin zionean. Zigortuak ez zuen arma erabili edo edukitzeko baimenik, eta egin zituen tiroek Agoizko Trinkete kaleko bi etxeetan kalteak eragin zituen. Hori dela eta, hamar hilabeteko espetxe zigorrak gain, kalte horiei aurre egiteko 50.000 pezeta (2.000 libera) ordaindu beharko ditu.

Alberto Barandiaran | Iruñea

Nafarroako Parlamentuak dei egin dio gobernuari *behi eroen* ondorioz sortutako zati arriskutsuen pilatzeari «behingoz irtenbide eraginkorrak» emateko, eta arazoarekin bukatzeko.

Parlamentuan arazo honi jarraipena egiteko sortutako batzordean Ortuellako Manuel Garcia Mendoza enpresako ordezkariak agertu ziren atzo, eta, adierazi zuten, euren enpresak nahikoa gaitasun badu Nafarroan sortzen diren zatiak tratatu eta errausteko. Parlamentuko batzordeko presidente Jose Luis Urizen ustetan, Nafarroako Gobernuak «arrazoi politikoak» ditu zati arriskutsuak Bizkaira ez eramateko.

Egun, Nafarroan, pilatuta daude *behi eroen* gaitzaren ondorioz sortzen diren zati arriskutsu guztiak, oraingoz ez baita akordiorik lortu lurraldean dagoen porlan-fabrika bakarrarekin, Portland enpresarekin alegia, horiek errausteko. Gainera, eta atzo Euskal Autonomia Elkarteke hondakin guztiak tratatzen dituen enpresako ordezkariak adierazi zuten, zati arriskutsuak ustez irin bihurtzen dituen Nafarroako enpresak egun legediak eskatzen dituen lau urratsetatik bakarra betetzen du. «Europa osoan kasu bakarra da Nafarroakoa», esan zuten.

Iruñerriko Mankomunitatea behin baino gehiagotan harremanetan jarri da Ortuellako enpresarekin zati arriskutsuak tratatzeko, baina Gobernuak geldiarazi du prozesua. Parlamentuko Batzordeko kideen ustez, Ortuellako soluzioa merkeagoa eta logikoagoa litzateke.

ESPETXEAK

Nafarroako kartzela berria non eraikiko duten erabakitzeke izatea ontzat jo du Izarbeibargo plataformak

Gobernuak Nafarroako kartzela berria non eraikiko duen, artean, erabaki gabe izatea ontzat jo zuen atzo Izarbeibarko plataformak. Alfredo Chourraut plataformako presidenteordeak azaldu zuenez, «kartzelaren inguruan oraindik erabakiren bat hartu ez izana ona da bai guretzat eta baita beste nafarrentzat ere». Aitzitik, lanean jarraitzeko asmoa erakutsi zuen Chourrautek. «Lanean jarraituko dugu horren inguruko eztabaida bat sortzea dugulako helburu; Nafarroako gaztigu moduak zein behar duen izan erabaki behar du gizarteak eta hori lortu artean guk geureari eutsiko diogu», gaineratu zuen Chourrautek.

AZPIEGITURAK

Iruñea-Logroño autobidearen auzian arduragabe jokatzeari leporatu dio UPNk oposizioari

Iruñea-Logroño autobidearen finantza-legea tramitera onartzeko proposamena atzera bota izanagatik «axolagabekeria» jokatzeari egotzi zion Miguel Sanz Nafarroako presidenteak oposizioari, atzo. «Gobernuaren proposamenak beste barik oztopatzea arinkeriaz jokatzeari da», azaldu zuen Sanzek. «Politikan edozer egin daiteke baina oposizio serio eta zentzudun bat ere. Oposizioa oposizio egitea hutsagatik egitea, ordea, ez dut nik inoiz onartuko», gaineratu zuen.

ESPAINIAKO SENATUA
Hizkuntza ofizialak atzerritarrei irakasteko laguntza ukatu du PPK

Espainiako Senatuko Hezkuntza, Kultura eta Kirol komisioak hizkuntza ofizialak atzerritarrei irakasteko diru laguntza ukatu zuen atzo, PPren botoekin. PSOE, CIU, EAJ eta CC laguntzaren alde azaldu ziren.

UNIBERTSITATEA

EHUko Gobernu Batzorde berria ofizialki eratu dute

Joan den maiatzean, Euskal Herriko Unibertsitateko (EHU) Klaustroak hautatu zuen Unibertsitateko Gobernu Batzorde berria ofizialki eratu zen atzo. Aldi berean, Gobernu Batzorde berri horrek Unibertsitateak Gizarte Kontseiluan dituen hamar ordezkariak eta EHUko Udako Ikastaroen Fundazioan dituen bostak aukeratu zituen atzo.

Jose Ramon Etxebarria EHUko irakasle kaleratua epaituko dute bihar

Jose Ramon Etxebarria EHUko irakaslearen kontrako epaiketa berri bat egingo da bihar Bizkaiko Entzutegian. Fiskaltzak agintaritzari desobedientzia eta kale istiluak leporatzen dizkio, eta bi hilabeteko kartzela zigorra eta 160.000 pezetako isuna eskatzen ditu.